

Här Fernand Etgen
President vun der
Deputéiertechamber
19, um Krautmaart
L-1728 Lëtzebuerg

Lëtzebuerg, den 20. Juli 2021

Här President,

Sou wéi d'Chambersreglement et virgesäit, bieden ech Iech, dës parlamentaresch Fro un d'Madamm Ëmweltminister an den Här Schoulminister weiderzeleeden.

An der Äntwert op meng parlamentaresch Fro Nummer 3985 zum Bau vun der neier Sportshal vum lechternacher Lycée huet d'Regierung ënner anerem Follgendes geschriwwen: *“Zum Volet Héichwaasserschutz gouf et am Kader vum Gesamtprojet “Campus Echternach” eng Etüd (Plan directeur Eau) déi vun engem lëtzebuergeschen Ingenieurbüro ausgeschafft gouf. An dëser Etüd ass festgeluecht ginn, wéi den Ëmbau vum Site héichwaasserneutral ka realiséiert ginn, an dat während der Bauphas vun deenen eenzele Gebaier an Infrastrukturen, wéi och no der Fäerdegstellung vum Gesamtprojet.*


Konkret zu der Sportshal war 2019 eng waasserrechtlech Geneemegung vun der Administration des batiments publics bei der Administration de la gestion de l'eau ugefrot ginn. An dëser ass ënnert anerem den Héichwaasservolet gekuckt, an den Dossier autoriséiert ginn. Deementspreechend entsprécht d'Planung vun der Sportshal den aktuelle gesetzlechen Ufuerderungen vum Waassergesetz an den Ziler vum Héichwaasserrisikomanagement”.

Wéi déi rezent Wiederkatastroph gewisen huet, bleift dës Plaz awer ufälleg fir Iwwerschwemmungen.

An deem Zesummenhang géif ech der Madamm Ëmweltminister an dem Här Schoulminister nach gär des Nofroe stellen:

- 1) Gëtt de Projet op Basis vun deene rezenten Erfahrungen nei evaluéiert?
- 2) Hunn d'Bauaarbechte fir déi nei Sportshal vum lechternacher Lycée schonn ugefaangen? Wa jo, wéi eng Schied sinn entstanen a wéi laang verzögert sech de Bau vis-à-vis vum ursprénglech geplangten Eröffnungsdatum?
- 3) Och d'Sportshal vun der lechternacher Gemeng, déi am Kader vum Sportsunterrecht bis lo vum Lycée matbenotzt gouf, gouf duerch d'Iwwerschwemmunge staark beschiedegt. Des Weidere stoungen och déi baussenzeg Sportsinfrastrukture vun der Schoul, notamment de Fussballsterrain an d'Käfiger, ënner Waasser. Kann den Här Schoulminister elaboréiere, wéi déi rezent Wiederkatastroph sech no der Rentrée insgesamt op de Sportsunterrecht vum lechternacher Lycée wäert auswirken?

Mat déiwem Respekt,



Fred Keup
Deputéierten

Gemeinsam Äntwert vum Här François Bausch, Minister fir Mobilitéit an ëffentlech Aarbechten an dem Här Claude Meisch, Minister fir Educatioun, Kanner a Jugend, op d'parlamentaresch Fro Nr. 4690 vum 20. Juli 2021 vum honorabelen Deputéierten Fred Keup betreffend dem Héichwaasserrisiko vun der neier Sportshal zu Iechternach.

1. Fro: Gëtt de Projet op Basis vun deene rezenten Erfahrungen nei evaluéiert?

De Projet ass konform zu der Geneemegung vum Waasserwirtschaftsamt vum 26. August 2020 geplangt, déi op engem honnertjäregen Héichwaasser baséiert ; deementspreechend hält d'Hal ouni Schied engem Waasserstand vun 162,25 m iwwert Normalnull stand (ongeféier 6 m iwwert dem normalen Waasserstand vun der Sauer respektiv bis 70 cm iwwert dem Foussbuedemniveau vun der Hal).

No den rezenten Iwwerschwemmungen gëtt de Projet an deem Sënn ugepasst, dass den peripheren Héichwaasserschutz nach eng Kéier um 30 cm no uewen erhéicht gëtt, an d'Gebai duerch zousätzlecht Gewiicht am Buedemberäich géint opschwemmen geséichert gëtt. Dëst ass nach méiglech, well de Bau eréischt an der Phase vum Gros-oeuvre ass.

2. Fro: Hunn d'Bauaarbechte fir déi nei Sportshal vum Iechternacher Lycée schonnugefaangen? Wa jo, wéi eng Schied sinn entstanen a wéi laang verzögert sech de Bau vis-à-vis vum ursprénglech geplangten Eröffnungsdatum?

D'Bauaarbechte hunn leschten Hierscht ugefaangen an sinn momentan am Réibau.

Et sinn keng direkt Schied entstanen, an d'Botzaarbechten vun e puer Deeg um Site hunn weider keen Afloss op den geplangten Eröffnungsdatum.

3. Fro: Och d'Sportshal vun der Iechternacher Gemeng, déi am Kader vum Sportsunterrecht bis lo vum Lycée matbenotzt gouf, gouf duerch d'Iwwerschwemmungen staark beschiedegt. Des Weidere stoungen och déibaussenzeg Sportsinfrastrukture vun der Schoul, notament de Fussballterrain an d'Käfiger, ënner Waasser. Kann den Här Schoulminister elaboréieren, wéi déi rezent Wiederkatastroph sech no der Rentrée insgesamt op de Sportsunterrecht vum Iechternacher Lycée wäert auswirken?

Et lafen intensiv Gespréicher tëscht der Stad Iechternach, allen Iechternacher Schoulen an den staatlechen Instanzen, wat de Sportunterrecht fir déi nächst Schouljoere betrëfft. D'Schwämm an déi grouss Sportshal wäerte warscheinlech abandonnéiert ginn. De Schwammunterrecht wäert deemno eng Zäit duerch dréchene Sportunterrecht ersat ginn. Et gëllt elo, gewësse Perioden ze iwwerbrécken. Esou ass ënner anerem geplangt, datt d'Stad Iechternach eng provisoresch Sportshal opriicht, déi am Laf vum nächste Joer soll a Betrib geholl kënne ginn.

Souwuel déi zwee bestehend Turnsäll ewéi och déi baussenzeg Sportinfrastrukturen vum Iechternacher Lycée kënnen weiderhin benotzt ginn. Et ginn nach zousätzlech Sportequipementer kaf, déi temporairement a bestoende Raimlechkeeten vum Lycée kënnen fir de Sportunterricht genotzt ginn. Domat ass deemno de Sportunterricht vum Iechternacher Lycée assuréiert. De Bau vun der neier Hal fir de Lycée ass an den Délaien a wäert Ufank 2023 fäerdeg ginn. Da kënnen déi ugeschafte Equipementer och duer transferéiert ginn.